

准予調補以資治理所遺瑞安縣知縣係衝繁中缺浙省現有應補人員應請扣留俟部覆另行請補除咨部外謹會同閩浙督臣松壽恭摺具 奏伏乞 皇太后 皇上聖鑒敕部核覆施行謹 奏光緒三十四年五月初十日奉 硃批吏部議奏欽此

又奏衢州府經歷劉景焯捐墊學款請獎片 再據提學使支恆榮詳據衢州府詳職員羅宗德等稟稱衢州府中學堂前因屋宇無多規模狹隘力圖擴充特派府經歷劉景焯向民間剴切勸捐惟衢地僻在山陬殷富甚少雖經遵諭勉力書捐而一時款無所出約於秋後呈繳計秋後款薄業紙之戶又復虧折以致捐款無從措繳而學堂工程需款甚急劉經歷念地方凋敝垂憐各捐戶一時難措陸續先代各捐戶繳洋二千二百五十元之多原擬於次年秋成措償不料入秋亢旱收成又復大減紙槽仍無起色今劉經歷慨然將墊款自行捐輸以免催迫等情由府查明屬實請援照新章按賑捐例五成實銀獎給藍翎同知銜經司核明詳請 奏獎前來臣查該經歷劉景焯捐衢郡中學堂經費先因捐戶未繳代墊繼以歲款節催無收竟能移墊作捐洵屬熱心公益自應援照新章按賑捐例五成實銀給獎核計所捐洋二千二百五十元合銀一千五百兩請獎給藍翎同知銜尙屬有盈合無仰懇 天恩俯准給衢州府經歷劉景焯藍翎同知銜以昭激勸除咨學部查照外理合附片具陳伏乞 聖鑒謹 奏光緒三十四年五月初十日奉 硃批著照所請該部知道欽此

署理山東巡撫袁樹勛奏衍聖公孔令貽丁憂回籍摺

奏爲衍聖公孔令貽在差次丁憂回籍守制恭摺代陳仰祈 聖鑒事竊臣據衍聖公啟事官楚士魁呈報

衍聖公孔令貽親母彭氏上年六月旬壽辰蒙 皇太后賜壽 恩賞無量壽佛尺頭等件謹於光緒三十四年四月十六日由曲阜起程赴 闕謝 恩行抵濟南暫駐因感患時疾至是月三十日病故衍聖公

孔令貽係屬親子例應丁憂現因查學在省理合呈請代 奏並請 旨將衍聖公孔令貽會查山東學務

差使開去俾得扶柩回籍守制等情前來謹恭摺具陳伏乞 皇太后 皇上聖鑒謹 奏光緒三十

四年五月初十日奉

硃批另有旨欽此

安徽巡撫馮煦奏沈鏞等捐助振款請爲其父母建坊片

再據上海振捐公所候選道曾鑄直隸候補道施則敬稟稱上年皖北水災待賑孔急經職等勸據花翎五品銜江蘇補用知縣沈鏞係浙江烏程縣人遵其故父四品封職沈崙源故母四品命婦沈蕭氏遺命並奉本生繼母四品命婦沈高氏面命捐助皖賑銀一萬兩又據四品頂戴候選布理問楊文藩花翎知府銜楊文瀾提舉銜候選州同楊文綬係浙江歸安縣人遵其父二品封職花翎三品銜候選運同楊福田母二品命婦楊陸氏面命捐助皖賑銀一千兩呈繳匯解災區援案籲請核辦等情當經行令確查去後茲據辦理賑捐局司道查明捐數相符詳請 奏獎前來臣查士民人等捐助賑款至于兩者例得 奏請建坊歷經辦理有案今沈鏞楊文藩楊文瀾楊文綬均能仰承親志慨濟災黎洵屬深明大義合無仰懇 天恩俯准將該員沈鏞之故父四品封職沈崙源故母四品命婦沈蕭氏本生繼母四品命婦沈高氏楊文藩等之父二品封職花翎三品銜候選運同楊福田母二品命婦楊陸氏各在原籍地方自行建坊給予樂善好施字樣以示 旌獎除咨部查照外謹會同兩江總督臣端方附片陳請伏乞 聖鑒訓示謹 奏光緒三十四年五月初十日奉 硃批著照所請禮部知道欽此

又奏請以豫咸署甯國守片 再甯國府知府榮普奉

旨開缺送部引

見所遺員缺應卽委員往署

以重職守齊有請補安慶府知府豫咸老成練達有守有爲堪以署理據藩學臬三司會詳請 奏前來除檄飭遵照外謹會同兩江總督臣端方附片具陳伏乞 聖鑒謹 奏光緒三十四年五月初十日奉 硃批吏部知道欽此

又奏長江水師提督巡緝到皖片 再長江水師提督臣程文炳遵

旨常川巡緝長江一帶訪查有無匪

黨盤踞及私運軍火情事業已到皖與臣會商巡緝辦法佈置情形旋卽乘輪上駛所有長江水師提督臣程文炳巡緝到皖緣由理合附片陳明伏乞 聖鑒謹 奏光緒三十四年五月初十日奉 硃批知道了